

Nationála geahččaleamit

Lohkan 5. ceahkki
Ovdamearkabargobihtát

Rieban beahtá vuoražasa

Muhtun vuoražasas ledje vihtta moni beasis muorragierragis. De bođii rieban ja dajai:

- Ollu go áhkus leat monit?
- Vihtta, dajai vuoražas.
- Atte ovttá munnje, dajai rieban.
- In áidnu ovttá ge atte mon, dajai vuoražas.
- Dalle mon gal čuohpan seibbiin dán muora ja válddán buot moniid, dajai rieban ja fáippui dainna guhkes seibbiinis. Vuoražas attii dalle ovttá moni.



Muhto dát dáhpáhuvai golbma beaivvi

maŋŋálagaid, ja de báhce dušše guokte moni vuoražassii. De bođii bulddogas ja dajai:

- Ollu go áhkus leat monit?
- Guokte! rágui vuoražas. - Guokte, guokte!
- Ráhkis, it go don eambo monne? dajai bulddogas.
- Vihtta mun monnejin, dajai vuoražas. - Vihtta, vihtta! Muhto fasttes rieban lea borran golbma! Dat rágui buot maid leaš veadján ja lei suhtus.
- It galgga moniidat addit dan gávvilis riebanii, dasgo das ii leat ákšu mainna muora čuohppá, dajai bulddogas.
- Das lea guhkes seaibi! Seaibi! Dat áigu dainna čuohppat! biškkui vuoražas ja bossuluvai.
- Há-há-há! boagustii bulddogas. - Eatnat gerddiid mon lean oaidnán dan ruohtamin vuovddi čađa ja seaibi fáškasattai birra muoraid, muhto in leat vel oaidnán ovttá ge muora gahččamin dan ákšu geažil.



Rieban bođii fas njealját beaivvi.

- Ollu go áhkus dál leat monit? dajai dat ja siđvái bajás guvlui vuoražassii.
- Guokte! dajai vuoražas.
- Atte munnje ovttá, dajai rieban.

- In ovtta ge! In ovtta ge! rágui vuoražas.
- Mon dalle čuohpan seibbiin dán muora ja válddán buot, dajai rieban ja fáippui seaibbi.

- Dat ii bastte! Dat ii bastte! rágui vuoražas ja vatnalahtii čeabeha nu guhkás go leaš sáhttán, vai rieban oaidná man son leai roastil ja suhtus.
- Mon manan šliipet dan, muljardii rieban ja manai vuovdái. Muhto ovdal go fas bođii, de ledje monit čivgan ja čivggat girdilan geidnoseaset.

Teaksta lea divoduvvon nationála geahččalemiid várás.

Vižžon girjjis Edel Hætta Eriksen – Per Persen – Lydolf Lind Meløy (doaim.) 1990: *Lohkangirji*. Sámi oahpahusráđđi, Girko- ja oahpahusdepartemeanta ja H. Aschehoug & Co. (W. Nygaard) 1990.

Ovddit siiddu teaksta lea vižžojuvvon muhtin lohkanirjjis. Ane teavstta go vástidat dáidda gáždagaide.

- 1. Galle moni ledje vuoražasas álggos?**
 - A. Guokte
 - B. Golbma
 - C. Njeallje
 - D. Vihtta

- 2. Movt rieban oačču vuoražasa moniid?**
 - A. Rieban vieččai daid ieš beasis
 - B. Vuoražas bálkestii daid sutnje
 - C. Rieban čuolai muora
 - D. Dat gahčče ieža vulos

- 3. Galle gearddi finai rieban vuoražasa luhtte?**
 - A. Oktii
 - B. Guktii
 - C. Golbmii
 - D. Njelljii

- 4. Galle čivgga oačču vuoražas?**
 - A. Guokte
 - B. Golbma
 - C. Njeallje
 - D. Vihtta

- 5. Movt fillii rieban vuoražasa addit moniid?**

.....
.....
.....



Schweigaards gate 15
Postboks 9359 Grønland
0135 OSLO
Telefon 23 30 12 00
utdanningsdirektoratet.no